

Kotavaxak dem suterot

Stefan Zweig

TWA KE  
MEGRUPENIKYA

Berpotam (1922)

Kotava, tela tamefa golerava

**KOTAVAXAK DEM SUTEROT**

**Stefan Zweig**

**TWA KE  
MEGRUPENIKYA**

*Germanavaf berpotam (1922)*

Kalkotavaks : **Angela Wagner** (2014)

*S. Zweig : germanavaf suterotik (1881-1942)*

**Darekeon.** R- urmaf berpotik, kaiki barkafa divunkera koe meftava ko Wien gazdon dimlapir. Koe golda va fela luster ; disukera mo evla luber, nume ve setiker da tir tela ke intaf ilanuk. « Balem-san-tanda », modovar, nume batcoba me puvegar meie puidar. In va awiles bueem ke fela dure gixur, aze va diremork rundanyar nume den int dimlapir. Inaf kwik gu toloya worara is konaka sumepulvisa rozara bak inafa gracaca givar, aze va tweem moe azekot vanburer. Berpotik va twa peckon disuker aze va konaka anamplekuxa dem dulapas staksesik sollipar. Taneon va twa dem megrupena sутера is nutisa tsokarsafa divzawar. Yelada su zo zanolur ; in koe iriba delvejon ladavagir, va fela is konak rubiaks gin gixur ; adim va ruse vanteyar aze va divzawayana twa narir.

Tid mon tol-san-aluboyu bu bimulon sutelayanu, dem perzafa ayikyafa sutera, i nubasuteks lodam twa. Mekuranon, va anamplekuxa gire tanon geltar enide co wir kase kona dositasa twa co tigir. Vexe anamplekuxa tir vlardafa, ise, dum miv bu, va meke staksase mane isu sugdaks dadir. « Divulafa », in trakur aze va bueem gin narir. Wetce kosuteks ok vergumvelt, ticak ke taneafu bu va batyon ravlem dadir : « *Pu rin mevieli grukeyes va jin* ». In gevanon vukir. Kas ale in ? Kas ale gestik ? Rilituca zo divmodar. Nume in toz belir.

Jinap nazbeik arinton al awalker ; ta giwara va bata mildafa blirama, va awalk barafizcekon is barmielcekon lyumayá ; remi balem-sanoy bartiv keneon debaneyeyé edje grakola va inafo kimtafo vozerso alto botceyer. Va anteyaweso jo tufedayá ; va vradaf nubameem mielcekon is afizcekon giyí. Arti taneaf viel tiyí poiskaf. Jinap iteem tabiyir ; volins budeweyer. Batdume

moe kimtafa rova bak baroy ok balemoy kenibeson zavzagiyí, nume batedje awalk va nazbeik al konarir. Re in, kimtaf is abegaf pintik, koe nilafa rumeafa ilava tigir, dum ba muluftera ; opelon, inaf iteem, orikaf is gruf iteem, al zo buder ; nubeem moe batakaf klaim al zo zokever, ise balemoya tsoka kotalavon ice ilava ontinon teyedad. Me rovedisuké ; me rovezeká lecen viele teyka darunted, pune izga mo gexata is budeyen art kilded nume inaf kolmeem cwe tubliar nume co rofolí da in me al awalker, fu divmoder, ise kan aftafa pudá va krenugon rumeafa ewa pu jin fu kalir. Vexe grupé, in tir awalkaf nume mea djudisuké enide mea di pokolé ise ten zo laredjá. Grupé, grupé, jinap nazbeik arinton al awalker ; re koe tamava va ant rin wan dikí, va ant rin grupes va mecoba icde jin voxé batvulon rotir vefal, vantrakuson va mecoba, oke do kon ayik iku coba relandewel. Va ant rin dikí, va rin mevieli grukeyes va jin vox kotvielu jinon renan.

Va alubeafa tsoka al narí aze mo azega al ayká batlize pu rin suté. Kire me rozavzagí, antaf do jinap nazbeik, unt mekizoyupurson. Ise ba bat mayakaf gemelt, pu toktel co rogukoé, vaxeon pu rin tiyis kotcoba mu jin is ware tis ? Me grupé kase umeka afton muxá, rotir va jin me gildal ? Jinafa taka tir rusagapafa ; ozdeeem tazewer ise felkur ; beweem rotesirsir. Fovozé ; ise rotir grakolé, larde akola tuveltuvelon mwarner, voxé batcoba vode tir lecen batkane do nazbeik co mulufteté nume va int me co gofiketé. Dile orikaf italk va iteem kabduofir ; rotir va bata twa me fu lajutenuké ; vexe va kotaf jinap poeem djulicá enide pu rin tanon di pulví, batinde tanon pu rin ey renanye, pu rin mevieli grukeyes va jin.

Pu ant rin djugukoé ; pu rin, taneatomon, va kotcoba kalítí ;

va jinafa varafa blira grupetel, i va blira kotvielu megrupenon krukleyesa mu rin. Voxe va jinafa birga grupetel oxam viele al awalketé, viele mea godulzetel, viele coba re deasa va jontikote opra is tey koo jinap beweem va jin kotvieli al atatar. Ede co moblití, pune va bata twa sollipatá aze wan stivaweté milinde kotvielu stivaweyé. Vexe ina ko rinafa nuba co artnipir, pune grupetel da awalkikya va blira pwader, i va intafa blira tiyisa mu rin, mali intaf taneaf bartiv ke jiluca kali bocaf. Va jinyona ewa me kival !!: awalkikya va mecoba sokimaxur ; i va meka renara meiu forendara meiu vinura. Antafa coba jinon eruna pu rin, tir da va kotcoba razdatana gan jinafa kranavera vanon gelbesa gofolil. Va kotcoba kalina folil !! Batse jinafa antafa blikera pu rin ; kontan ba awalkera ke tanaf nazbeik somerotuxar.

Va jinafa varafa blira djurazdá, i va bata blira en tozuwesa lanviele va rin al grupé. Batvieli, ina anton tiyir skaltaca is gojaca, liz jinafa setikera gire someestobayar ; tiyir furutsa lize gopa is vartebak va yon plek dem klubaf tazuk isu tisik besayad, ise jinafa takra icdeon mea setiker. Viele awiyil, tiyí san-bardaf, ise koe mona sokeyé lize wan irubal, koe bata mona lize koe nuba va bata twa re gil, i va jinafa bocafa bligaelera ; moe mil siduk irubayá, elimon lente tuvel ke rinafa kraba. Va wawafa nyobrikya ( kotedje sugawalkasa ) ke jwaristulik is inafa mazdfa sardikya tce mea setikel ; ilbulupuyunon bliyiv, laninde drasuna koe cinafa glastedafa rotakuca. Rotir va cinaf yolt meviele al grupel, lecen meka pozla bene tuvel tigiyir, ise metan va cin worayar, metan icde cin eruyur. Jontikedje ixam, weti san-alubda ik san-tevda ! Tce mea setikel, renanye ; vexe jin, ox ! va beta pinta skeupuson en setiké ; wan grupé, dumede

batcoba arinton al sokiyr, va viel is dace bartiv viele va pulvira va rin taneatomon gildeyé, va vula viele taneatomon va rin wiyi, ison tokinde batcoba co rotir ara ? larde acum tame va int mu jin al fenkur. Novel, renanye, da va kotcoba pwadé, va kotcoba mali toza ; krajul, vosé, da gildeson va pulvira va jin remi bartivamu me zo cuutul, i va jin bliracekon somecuuyun gan renara va rin.

Abdi rinafa inkera ko cinafo bedablo, kadime rinaf tuvel ikoraf robogan is motcas korik irubayad. Larde tiyid copackaf, sinafa akladara tiyir ilkadera va robiskaf vegungik, i va cin, lecen va sinafa yoromafa titpulayana zugiuca meinde djunobayav. Yasikye tiyir izakotik ; va kurenik gilalieyer ; jontikviele gan iyeptara ke trovgana rova ik empana razeka mielon zo divmodayav ; lanviele, yasikya forteyon kalalieyen, ton pekaf usuk, va fogelom titvulteyer ; izakotikye kadimeon ieyer vieli konak denulaniyis vegungik gu rozara va ardial dratceyed. Gadikya, tore, va beta skedara va sin al taruteyer ise pouyur da pu sinyon nazbeik di ropulviyir, vexe nume ban va int gu jin kottode jaxadayad. Viele koe vawila va jin kazokeveyed, va yoromaca iegayad, ise lanviele ben jin va olgapafu noldafixu kabuyud eke va jo forteyasiyid. Kotaf monikeem va batyon korik tanboyon ilkadeyer, nume viele sin va lana mibafa stuvaja lanviele raplekuyud ( ayikye golde dubiera nuve zo koflintayar ) nume va xo gojovleyed, kottan gin kagaelackayar. « Lizukedara » dung bene tuvel ke bedablo konakvielon tigiyir aze zo deswayar ise gu susik kalion tavuyuv da lan suterotik, i weltikye antafe is aulafe, va kraba su lizukeduyur. Batviele va rinaf yolt taneatomon gildeyé.

Arti konak viel, lingesik is zikesik is girodasik is stornasik

piyid aze kobayad enide va kraba buluyuna gan saljakiraf kerelesikeem di dimdesayad ; anton tiyid myelgara is lorara ke xeka ik tucuara ik fasiara ; vexe gadikya mekon zo funeyer kire kalyir da vegungikafa exomanyaleraja adim mea di dilizeyed. Luxe rin, remi kotafa divsokera va rin me kozwiý : kota kobara gan rinaf kwik zo eninteyer, i gan kwik martigkirapaf is omaf is ekemaf, ton lukoptaf usuk, calgon gades va kotcoba kan frendaf bask. In va kottan woepeyer, taneon kire koe cinafo gastafo bedablo martigkiraf kwik divdaakes va dugikeem tiyir warzaca, ise dere kire, meystaweson do kon kwajik is measkipeson gu palik, tiyir dolapaf dolge kottan. Mali taneaf viel, va jinafa gadikya dum weltik tarkon kiavayar, ise dace tove jin anton tis sardik, kotviele vanyeyer dinaf is ekemapaf. Viele va rinaf yolt tiyayar, gideckeson sokaskiyir, pilkovon krafiason : kottan vere sonkeyer da in va rin kraliyir loeve kon zanisik gilaskir. Ax ! va bat kiewaf Johann golde batcoba al karolá, beka djumayá da in aname rin kotedje tigiyir ise zaniyir !

Va batcoba pwadé, renanye, i va riwe kipeafa kotbata xa, enide gildal inde mali toza, tove bat vudesaf rumeik dum jin tiyis, va mana rictela kourlickeyel. Dace abdida va jinafa blira kofiyil, tumtalimeginda dum robuda dem kuluca is divuluca is bula va rin anamefiyir : koe bato gastafo bedablomo ( ayik vwepon blis sorit rilitaf gu kota warzaca dilizesa kabdue inaf tuvel ), kot cin va rinafa pira mekeon keyev. Ise bata rilituca koswavasa va jin, maneke laumayar, viele lanrielon dimlanison kou bema, va bures direm kabdue cinafo bedablo wiý ! Cugo guto, telo gamiafo, ko kraba ixam al zo ticbureyed, nume va telyono bagafo tantanon re zo viunsuyud. Moe pikay ranyeson zavzagiyí enide va kotcoba di romafelayá, lecen rinaf gutoeem

cwe nutiyir divulapaf ise va kon oltavaf mevieli al wiyí ; batlize tigiyid indiafa diersa is italiaf balumaks is ksevakirapafa trutcapa is dere jontikote is jontikdroe listapafa neva eke va mancoba vol co rogestayá. Kota sina mo pikay zo ezbayad ise batlize kwik tantanon nariyir aze kan bruxaxa skudason basgopayar. Aname ezba riliton mwarneyé ; ina dun ticniyir ; kwik va jin me malplatiyir voxé me koldayar, inde va meka neva rovebuzayá neke va woftulaf lelt ke jontika co djukatsedeyé. Daduon is kivason, va vergumvelt anton rodisukeyé ; francavafa neva isu englavafa vanmiaeon tigiyid ; isu aryona suteyena kan ava jinon megrupena. Va sina tce konakbartivon co nyaseyé, vexe gadikya va jin ve rozayar.

Batsielcekon va rin dun trakuyú neke men al wiyí. Jin, va mon sanoya gradjokafa neva dem liwayaf kagluyaks anton digiyí, i va lamenapafa neva albarsana is dure gire belina ; batvielu rieta va jin dustuleyer : bate ayikye digise va batjontika ilamtafa neva isu beliyise, is grupese va kotbata ava, i belcon tise kulackafe is grupeapafe, tokinde rotickir ? Sedme jin, voltuwavafa tarkinda gu rieta va manote neva katanaweyer. Va rinafa altoza lagestiyí. Tiyil klaik, dem wezo is abrotcaf batakaf lukast oltavaf gu cinaf tavesik va tawavopa, i loon neciapaf isu listapaf isu zijnapaf ; me grupé dume batviele laneyé, vexe cwe tiyil listaf, dace viele va rin wetce klaikye trakuyú. Batmielon, vox men grupeson, taneatomon va rin klokayá.

Direvielon koirubayal, vexe beka va rin pitcayá, me lajukozwiyí ; jinafa rilituca laumackayar. Adim, bak bareaf viel, va rin wiyí, nume jinafa akoyerá tiyir gjapafa, rabateson da tiyil amidapaf gu jinafa darefa gestira, i vol kapburedas va ewava va Gadolorik inde rumeon al guzekayá ! Va agralaf

guazik dem wezo al klokayá, voxé batse rin tiyil, milinde re wan til, rin mebetawes, va dan tanda meuzason mookilded ! Va felbes aftaberetraf utiaboz diskiyil ise va fogelom ticvulteyel, ton rinafa yafa merodolunena tuzuca, sotré toloy avlak azu toloy. Va edji koe nuba giyil, nume gevartsan, va rinafa gexata kotrafa gu bli is aftuca dem sardaf usuk, batinde nyaseyé : wison jontikeke tiyil jotaf is plaxaf is glabaf, akoyenon en skotcotevé. Ise batcoba tir megevasa : mali bata taneafa vula, va coba satolena gu rinafa kerdela gan kottan, cupon satoleyé, i va coba tanon pestalena kan akoyerinda. Toloy ayik koe rin tigid : bate lujafe yikye, itupafe, kotrafe koe vefara is stuva, is miledje, koe rinafa yamba, korik dem merovandilina ekemuca, i sagaf gu goni is arayakirapaf is gedelapaf. Va coba sodiepilena viele zo grupel, mejilon pestaleyé : va jontolafa blira stal, i va bata blira dem aftaf lesay ronjon dulapes va tamava, is bana estobasa ko izga, anton grupena gan ant rin. Va bata jontolucapa, va birga ke rinafa kruldera, jin, i bata san-balemdafa rumeikya diolon drolena gan rin, ba taneafa kodisukera pestaleyé.

Ixam gildal, renanye, tela ribiega, i tela jekusa welima tori jin... gotiyil, i tori rumeik. Tisik payun kir sutes va neva, kir kotgrupaf koe datafa tamava, voxé va battan leve kolmeem ke glabafe tol-san-alubdafe yikye kolukafe dum oyik ve kosmayá ! Kas dere gokalí da batvielu, dene cinafa mona, dene kotafe jinafe rumeafe tame, mecoba va jin mea dulapayar, vaxe rin ? Ise kan grolerarsa is dustulesa giuca ke san-bardafa sardikya, bam va tanoya coba abdikereleyé : aname rinafa blira isu kruldera di mwarneyé ! Va rin dizveyé, va rinyona giltira dizveyé, va kot korik pis den rin dizveyé ; ise batcoba va jinafa

rilituca tove rin laumasiyir lodame irutayar, lecen jontolafa adala ke rinafe tise rem gedruca ke batyona worara muxaweckeyer. Yikye piyid, i rinaf palik doon kipeyel, i vayasik moron vagekiraf, is dere yona ayikya kan direm, is dace lanviele gadesik va Kaleyaxe, i kitcovokilapik sumuon kozwiyin kadime bugi is tukotras va jin gu tarkuca, is dere yona oyikya ware nobasa va kazolda is toktenon anjesa va rinaf tuvel : sopron, jontika ayikya. Batcoba va meka pilkovaca sugdalayar, dace viele mallanison van bema, va italkkirackafa weltikya denulanisa va rin wiyi : batviele anton tiyi san-bardaf ise jinafa skeusafa rilituca ulijdasa is pitcasa men grupeyer, larde tiyi biwe sardaf, da batcoba ixam tiyir rena.

Vexe, renanye, va viel is bartiv re ware gruvecké viele va rin kotron is kotvieli suveyé. Do bemapalik al gozayá, aze kabdue tuvel pulviyiv. Direm kaliapon artlapiyir ; vukir aze, ton rinafa braldesa is terindafa laniga re ware felbesa va jin, va avlak titgrabluyl aze va tuvel vanlaniyir. Va tela mejilafa gijarotiua abduplatisa va jin me grupé voxen fenkuyú ; va rinafa lanira gamdayá ; va sint riwe klantayat. Kan bata idulafa is zijnafa is anamplekusa disukera dum krenugaca va jin kaldisukeyl ; pu jin krenugackon kicegayal aze kan gemafa is riwe yastafa puda kalyil : « Va weltamikya grawapá. »

Tiyir kotcoba, renanye. Vexe mali bata vula, malida va bata zijnafa is krenugafa disukera kev jin almayá, varon mu rin tiyi. Kaikion sonkeyé, ax ! fure sonkeyé, da va bata ayewasa disukera, i va bata disukera anamon zatkoron sumpasa, i va bata disukera belcon anamplekusa is basvagesa, i va bata disukera ke tuwavaf brostasik, pu kota ayikya pokolanisa getcal, i pu kota doltunenikya dolesa va koncoba, i pu kota mawakwikya

fenkusa va tuvel ; dene rin bata disukera sotir mejilafa, va kuranira is suvera somedikir ; lecen rinafa krenuguca tove ayikya, mejilackon, va zижнаfa is idulafa tiva pu rinafa disukera sozilir viele van ina rwoder. Vexe jin, san-bardafa sardikya, va bat rinaf adalolk me rietayá : ko teybost laninde zo estobayá. Foliyí da bata krenuguca tiyir mu jin, mu ant jin ; bata tanafa vula stapeyer nume askiyir da jin sardik vanpiyí ayikya, aze bata ayikya mu rin kotvieli di tiyí.

« Toktel tir ? » nikya eruyur. Vere me rodulzeyé. Va rinaf yolt vol kalyí. Mali bata taneafa vula, mali bata tanafa, in tiyir birgaf, al vanpiyir jinafa birga. « Baix ! weltik batlize irubas koe mona », azon voloblion tcipayá.

« Tokdume battode al vanpil maneke keraf viele in va rin al disuker ? » jinap nik balgeyer, kan kotafa rovuca ke rilitaf sardik. Ise efe lecen pestaleyé da inafa balgera va jinafa birga gukoeyer, fortey va tcor ware lodidulon ticniyir. Funera lize tigiyí va jin tuyoromayar : « Ifapol ! » fikon iegayá ; co djutelomtayá. Vexe in lopoon is lobalgeson toz kipeyer ; va ikuzara ke megijarotifa zidera ticnisa va iteem pestaleyé. Va in batlize jovleyé aze den jin ticvulteyé.

Mali bata vula va rin al rená. Grupé da jontiktanya va bata ewa pu rin al kalid, i pu sinaf blokan rumeik. Vexe va jin folil, gan ar metel maneke al zo renal. Dum levetirik, dum vakol, maneke abidason renayá inde batugale tiyí aze mu rin kotedje al zavzá. Mecoba moe tawava va mekozwina rena ke sardikya izgon blisa sovektar ; bata rena sotir fastapafa is dulkapafa is gruidepena is skeusapafa eke gan djumarakirafa nek dinesa rena ke kona nagenikya zo somemiltatar. Ant antiaf rumeik va intafa

kotafa skeura unt sorosur : artan, ginelason is odiaxon tuaxason va pestaka sotcastad ; icde rena al gildeped, va ina koe neva al trasid, ise gruped da tir dofa mwa. Do ina dum aalk vefad ; tid guon greciaf, dum sardik gu taneafa ruseta. Vexe jin, pu metel va int rotodiayá, metel rogivayar ise rowalzer, tiyí bagaliskaf is megrupes : va jinafi bali dum bup ipeyé. Kotcoba ticfisa is rumbesa koe jinafe tise va ant rin grupeyer, va rin anton roklokayar ise va rin wetce odiaxik anton rodikir. Gadikye jontikedje al awalkeyer ; gadikya tiyir divefa gu jin, golde intafa elupkafa gabentuca isu anzana cuca isu trumara ke nyobrik, i gadikya anton digisa va turwi ta blira ; sardikya ke bema, ixam firugamana, va jin idayad kire do kotcoba tce tisa ilamafa skeura fokton vefayad. Acum kotcoba arlize solparsawesa is solzartewesa va antafa elega koe jin tazukayar, nume jinafe varafe tise, unt avplekuwese is dure lembiegase golde guyafa lujuca, van rin rwodeyer. Mu jin tiyil, tokkane rokalí ? kota dolunera co tir axarsafa, tickiyil kotcoba mu jin, jinafa kotafa blira. Kotcoba anton kruldeyer ede va rin icdeyer ; mecoba ke jinafa blira tiyir pestakirafa ede gu rin me vanplekuyur. Va jinafa kotafa blirinda artazukeyel. Batvieli tiyí brunaf is rotakaf dene bema, bam levgon vanpiyí taneik ke pula ; va konaka decemoya neva beliyí, ison gavepon bak mielcek, kire grupeyé da va rena albayal ; gevapason va gadikya, levgon toz klawuyú, cugeke mingason kire va lexa tce albayal. Va jinyone vage gambeyé ise va jinafa ingara trumayá anton enide di nuvelayá cuf is mempesaf gu rin ; ise rieta da jinaf guazaf pulawem ( i artazukaks va monagem ke gadikya ) va lujor kum loplekuyun lay keve taltak diskiyir, bata rieta tiyir vitcafa gu jin. Ede xuye co katcalayal, ede va jin co vliguyul ! Batdume va gracoxa keveon licayá kotviele va fogelom ticvulteyé, skotceson is

kivason da co kozwí. Vexe batcoba tiyir volpestorafa, lecen  
mevielu, riwe mevielu, va jin al disukel !

Neke, tire, va rin gibekeyé ise gibepitcayá. Rem cinaf tuvel  
tigiyir wezama kum blafotaf lelt dem anamkafe fe lizo va coba  
kaikeon dilizesa kabdue rinafa kraba rowiyí. Bata weza, ~ me,  
me kicegal, renanye !!; re ware me tiyí kinokaf gu batyon  
bartiv !~ bata weza mu rin tiyir ita kan dana va tame kosmayá ;  
batlize, remi yon aksat isu tanda, koe fentapafa zeria, kivason  
va rodaxara ke gadikya, dem neva koe nuba debaneyeyé, rielon  
gibepitcason, i sotcenaf dum wazdel ke dingeltok, is milinde  
yartes viele rinafa tigira uzayar. Va rin anton trakuyú, dure kes  
isu liziwes ; vexe va batcoba sonkenseyel ; dum koe rinaf ucom  
va sotcenuca ke trulasiuva keon patasa is sabesa va rinyon  
bartiv koe izga, is dositasa va rinyona bora kan meroremzawasa  
gandira, solve remi celemoya sokrodoesa *tik tak* lorara, rinafa  
bimulafa disukera biwe tanon vwalar. Va kotcoba icde rin  
grupeyé, va kota rinafa giltira grupeyé, is va kot rinaf bagalt, is  
va kot rinaf aboz ; va kot rinaf worasik fure tcaluteyé ise  
solwiyí, ise gu toloya loma walmuneyé : va telyon luntaf gu jin  
isu volluntaf ; mali jinafa san-bareafa tanda kali san-teveafa,  
mek bartiv al remfir edje mu rin me bliyí. Ax ! va manyona  
oviskaca batugale raplekuyú ! Va tuveltialt uzayan gan rinafa  
nuba kutcayá, va rusetalixa mimayana abdi kolanira anyerkon  
faluyú ise ina tiyir baerdafa gu jin kir vwalayana gan rinaf kutc.  
Decemon sielon, yonton gu betcoba, va vawila titlaniyí enide va  
tela rinafa mawa koafina wiyí nume va rinafa tigira batkane  
lokramon pestaleyé, i va rinafa merowina tigira. Ise, remi  
konaka safta edje koyayal, ~ jinafa takra kivason sovukiyir  
viele va sintaa Johann titplekus va rinaf blafotaf koyareyelt

wiyí ~ edje batyona safta jinafa blira tiyir awalkafa is mukiskafa. Volaflliceson is arganon is trukon laniyí ise dimlaniyí, ise kotviele gonobrayá enide gadikya va jinafa gripokolera golde jinapiteem tukeran gan ikuza me katcalayar.

Grupecké da va yona vertovafa ilamsiskera is rumeafa oviskaca batlize pwadé. Co gotí kinokaf lecen jinafa rena mu rin meviele tiyir loon karafa is loon skeuna dam reme batyona rumeafa ilamotara. Remi jontik bartiv, remi jontik vielcek pu rin co ropwadé inde do rin batugale al blí, i do rin grupenses va jinafa gexata lecen viele moe fogelom va rin kakeveyé ise me rotaruteyé, kivason va rinafa anteyasa disukera, dum kontan fure ipes va lava ta otcera va tey, takomason kabduovulteyé. Remi jontik bartiv, remi jontik vielcek, va batyona tanda jontikedje rinon vulkuyuna co ropwadé ; va varafa jara ke rinafa blira co rogritanamé ; vexe va rin me djumargé, me djumolyasté. Va tela listafa bifa ke jinapiteem sardugal anton ware djurazdá, nume va jinafa melafokuca vay me nulel, lecen mu jin batugale tis rumeik, batcoba tiyir lumiske. Bak lan taneavel cwe tiyir ; koyayal ise rem fenkuyun tuvel ke rinafa kraba rinaf kwik va gamiaf tcalist dendayan impadimayar. Bureson kuncayar, guazanyik, nume tupirtaweson kevlaniyí aze eruyú kase co di ropomayá. Zo akoyeyer, voxé iskeyer da di askiyí, nume batkane va koak ke rinafa kraba wiyí ~ ax ! ton mana tarkafa is lorbafa drolenuca djukalí !~ i va rinafe tame, is va azega bene dana ta sutera gidebanyeyel ise lize konaka imwa koe trig kum faltaf vewuk tigiyid, is va rinaf gutoeem isu trutceem isu neveem. Batcoba anton tiyir presafa is anyerkafa disukera ko rinafa blira, lecen sagaf Johann ape co poujur da pokarson co rodisukeyé ; vexe bata disukera stapeyer enide va

kotaf alpoz kodayayá ise va uma sinka pu jin dafuyur enide krodoeson is modason, va rin lumiskon di roklokayá.

Bata kaliafa vula tiyir tela lokalafa ke jinap sardugal. Al djupwadé enide, rin me grunes va jin, adim toz gildal inde lana blira kali vanmecobara va rin al suver. Va bat al djupwadé, do ware banar, i do bana eaftafa vula goxe tiyisa vegungapafa gu taneafa. Milinde ixam al kalí, mu rin va kotcoba al vulkuyú ; va gadikya me viunsuyú ise va metan trumayá. Me katcalayá da klaackafe weltikye, i kazik ke Innsbruck, kogluyayan sumef vuwik ke gadikya, va ina jontikviele worayar ise zavzagipiyir ; volson, luxe jin batcoba tiyir puve, lecen va Gadya ko wenyaxe gistantar, nume battode rotiyí antaf ise va rin rotrakuyú ise ropitcayá, ise batcoba tiyir jinafa cugafa is tanafa tierdua. Okie lanvielon gadikya ko intafa mawa va jin gorestackon rozayar, kalison da ekemon gopulviyir. Tuzwaweyé ise jinafa takra laizon popon toz klantaweyer : kas va koncoba vantrakuyur ? Kas al diepileyer ? Jinafa trakura mu rin ve tiyir, i mu rin tis tela birga kagluyasa va jin gu tame. Vexe dace gadikya zo tokteyer ; va jin tanon az tolon krenugon kutcayar (someaskiyir) ; mo saxa va jin pokon vanimpayar aze bam toz pwadeyer, klabuson is vazon, da inaf vuwik, tis nyobraf, va ina al kuredayar ise, nelkon oye jin, djukunaleyer. Fortey ko jinafa takra loon tizon orayar : jinafa jiluca va tanoya trakura dulzeyer, i va trakura enrwyodesa va rin. « Vexe icle, batlize zavzagit ? ~ biwe rotcipá. ~ Volgue, ko Innsbruck lapit ; Ferdinand va listafa garia banlize digir. » Loote me gildeyé ; jinap iteem tutapedaweyer. Azon zo givayá da al krezyeyé ; gildeyé : gadikya pu ikagadikye keyese kadime tuvel omapudon pwadeyer da nubasotceson laizon al dimelaniyí aze dum

digflava al titkeyé. Me ropwadé inde diref viel dilizeyed ise jin, axaf rumeik, kev sinafa vamoegafa kuranira kuzuyú : anton trakuson, jinafa nuba suteson wan skotcer. Larde va ageltucafa birga me rorazdayá, jinafa acagira anton nutiyir grolera is ikoruca is budaxara. Metel va koncoba mea kaliyir ; kotcoba kev jinafa grupera zo askiyir. Bartiv, viele koe bema tigiyí, ta viunsura va divsokesira zo favlayad : kotviele va mona dimdenlaniyí, kon warzaf plek al zo divbuluyur oke al zo doleyer. Acum va kraba plekplekon malnisa is milviele jinafa blira wiyí ; adim, lanviele ta miafizestura dimdenlaniyí, rabateyé da divsokesisik al piyid nume va kotcoba al divbureyed. Koe vlardafa mawa gadiafa biloxa tigiyid, is toloya pemaxoilava mu gadikya is jin : diremielon batlize ware gokenibeyev, bocamielon, aze tori Innsbruck direvielon di mallaniyiv.

Remi bat bocaf vielcek, laizon elvon ve laneyé da dive rinafa vegunguca me di robliyí. Voldo rin va meka giwara wiyí. Somerokalítí kane bata rieta fiyir ise kase remi batyon pokoles bartiv geltron cuon rodetrakuyú ; vexe levgon ranyayá ( gadikya al divlaniyir ) aze, inde bemabozkiraf awiyí, van rin laniyí. Oke vol, « laniyí » trogarn tir metageltaf : kre tiyir zatafo po vanplatiso va jin van tuvel, ton tritaf nimateem is skotces waleniskayeem. Su kalí, me grupeckeyé va coba djumeyé : tit rin va int djumimayá ise djublikeyé enide va jin wetce zanisik co di sujur, i wetce levetirik ; ise kivapá da va bata volgunafa ukuca ke san-alubdikya kicegatal ; vexe renanye, mea co kicegal ede co grupel tote batviele tigiyí, diveon koe fentapaf plor, tutritan gan vudera nek abduplatin gan merogestano po, ise kane va jinafa skotcesa ma gu alto laninde soltoltreyé nume

ranyayá ( batcoba tiyir lyumara jijasa bak yon virnaf verast dum kotabaca ) aze gelt va tuveltialt xuvayar. Ware re va opagaf lor ke mamlesiki az daref amlit koe oblaka vidé edje jinafa takra vukiyir nume, ton fortey mea pridus, anton pitcayá kase co fu artlaniyil.

Vexe me artlaniyil. Metan piyil. Batkielon tce al trubayal, ise Johann va kona lustera askiyir ; aze ko romplekuyuna is divbuluyuna kraba lopceson kle dimlaniyí ( dem mam ke mamlesiki koe felkus oblakeem ), aze kuncarsayan mo koyarafu modivatcesiku va int mimayá, tison cuesipin gu bata balemoya bora mileke bak konak bartiv koo vafa nolda co al laniyí. Vexe bata kuncanuca va jinafa djukuwira va rin is djukupulgira wan anteyayar abdida gu bato xo di zo solimpayá. Koe batcoba, vogá, meka pestapuvefa trakura tigiyir ; wan tiyí megrupesaf, elimon kire va rin anton trakuyú : va rin opelon djuwiyí, gire djuwiyí, va int gu rin djuxodayá. Mielcekon, remi bat mayakaf mielcekap, renanye, va rin keyé. Moida gadikya koe ilava senyeyer ise kenibeyer, ko zeria anjeyé enide va rinafa dimkolanira di gildeyé. Mielcekon keyé, ise tiyir fentapaf mielcek ke taneaksat. Cuepeyé, beweem rotesiyir, beta deba mea tigiyir : nume mo fentafa myeza senyayá lize gaelsalt va tuvel levuniyir. Batinde senyeson zavzagiyí, tufentapan is ton wanieno alto, anton diskis va tiguafe vage kir menariyis va modivatcesiku ; me djumidulerseyé kire kivayá da co di komodeyé ise va rinafa bora me co di gildeyé. Va man kranav satoleyé ! Va nugeem kev sint zadreson xuvayá, meem skotceyer, ise dun goranyayá larde koe bata virnafa tapeduca fentapayar. Vexe keyé, keyepé, va rin wetce jinafi bali keyé.

Adim ( tce tiyir tole ok bare gazdabartiv ) va titeon

vawilatuvvel fenkun az bora ticlanisa va fogelom gildeyé. Fent va jin ve jovleyer aze idulap konariyir, aze va tuvel zíjnon fenkuyú aze va rin djumipeyé ise tit rin va int djumimayá... Ax ! oviskaf rumeik, vol grupé va coba bam co askiyí. Bora vanlaniyid, afi ke raki koo fogelom darunteyer. Va arelta ke tuvel skotceson giyí : kas en tiyil rin batinde ticlanis ?

Gue, rin, renanye, vexe ant me tigiyil. Va daavafa kiperama gildeyé, is va laluwerama ke lesogem az rinafa omon pulvisa puda. Do ayikya dimdenlaniyil...

Tokinde va bat miel rolapteyé ? Me grupé. Rielon direvielon, ba anyuste bartiv, ko Innsbruck zo stayá ; va acagiso po mea diyí.

Jinaf nazbeik daremielon al awalker, batvielu ant gire tigití ede wan goblí. Eldeon megrupene ayikye, yoromafe is ebeltavagekirafe, artlanitid ise va warfok vanbureted, aze va jinaf kimtaf tanaf nazbeik plekutud. Rotir nik vanbures va imwasona lanitid, vexe tokcoba imwa moe warfok askid ? Sin va jin vinutud, va ewa az ewa kalitid, vexe batcoba va tokcoba zanutatar ? Grupé, ant gire tigí. Antuca vanmiae korikeem tir tela lomayakafa coba. Banugale sonkeyé, remi bata teniskafa tanda tiskiyina koe Innsbruck, bak bat ugal wali jinafa san-teveafa tanda isu san-anyusteafa edje wetce gralomenik is kawazdenik dene jinafa yasa bliyí. Ikagadikye, i pulvimi aulapik, tiyir vonafe gu jin ; dumede va mebaltanafa memalyaca co djudimempayar ; gadikya vanyeyer algafa gu kota jinafa jugemera ; yikye aname jin tandeyed vexe va kote mingarsason ilikatcuyú. Ile rin kalon is valeon me djubliyí, nume va orikafe tame dem antuca is jinyona olyastewera titfiyí. Va mek listaf

warzaf gem lusten mu jin diskiyí ; ko dolpa is wenyaxe vol djukulaniyí, oke va kona daavafa divunkera vol djukupakeyé. Va mona nemon divlaniyí : kas co folil, renanye, da koe bata widavama lize toldon bliyí, va lea sanoya nuda grupé ? Sugawalkeyé ise djusugawalkeyé ; gu kota zelara va int tugrijayá, i gu kota zelara loplekuna gu tela va wira va rin. Tcilon, gu jinafa skeura me zo djudeaseyé : mu rin djubliyí. Dene jin debanyeson zavzagiyí ; jontikbartivon, jontikafizon va rin anton trakuyú, dun trakuyú, gire dure malsetikeson va decemoy setikeksam va rin, is va kota kakevera isu kera, is kotviele gestison va batyona zixama, dum dene wenya. Ise lecen va kota vula ke jinap darekeugal jontikviele batinde al divrozá, kota sardugal al zavzar anteyapas koe nami eke ware re kota wexa ke batyona tanda ton idul is kontega unt wan blir lieke ede sina arinton va jinap fortay al skotcotesiyid.

Mu ant rin banugale bliyí. Va kota rinafa neva lusteyé ; viele rinap yolt koe fela tigiyir, batcoba tiyir kapavel mu jin. Kas folitil da va kota conya ke rinyona neva namickon grupé larde va sina dun beliyí aze tolbeliyí ? Ede mielon kontan va jin co divmodar, ede va tanoya conya kou kona rinafa neva kabdueon co tiyar, pune ware re, arti san-barda, co rodakití, dum koe klokara ; lecen kot ravlem ke rin tiyir evangil is blikera. Sedme jin, kotrafa tamava kappure rin anton kruldeyer : va kota dolpa isu zirsera koe fela ke Wien dulapeyé, anton lecen djugrupeyé va tela rodulapasa va rin, nume viele sielayar, va rin iluon dositayá : « Batvulon in va bonta kolanir, banvulon debanyar. » Va batcoba kunon klokayá kire tanon, lanviele, koe dolpaxe va rin al wiyí.

Vexe tokdume va batcoba pu rin pwadé ? Va bata yatkafa

ukuca ke jin kev jin, i va bata ukuca folvon gripokolena ke jovleyena rumeikya ? Tokdume pu kontel somevantrakuyus is somegrueyes pwadé ? Batugale, wori, kas wan tiyí rumeik ? Tiyí san-perdaf az san-anyustdaf ; yikye koe vawila van jin toz rwodeyed ; vexe va jin anton zuneyed. Lecen renara ok dace vefason rietara va renara va artan dam rin tiyir volrotenvana is endivefa gu jin ; opelafa zoenuca cwe co tiyir gomilara. Jinafa skeura va rin zavzayar mila ; voxé, milugalon gu jinafo alto artazukaweyer ; darpeda jinaf pesteem divmodaweyer, loon tulujaweyer ise tualtokaweyer ise tuayikyaweyer. Ise va coba sardikya me rotabdiestaleyer, i sardikya dire impayasa va mamlesiki ke rinaf tuvel yoke intafa megrupesa kuranira, batcoba re tiyir jinafa tanafa trakura : va rin kempatá, va int pu rin jovleté !!

Korik tigis aname jin trakuyud da tiyí kivasaf ise va jin gu vazuca duvuyud ( icde jinafa birga me al talgafenkuyú ). Vexe unt azilafa kuranira tazukaweyer. Kota jinafa trakura isu sugara va tanaf mukot vanatceyed : ko Wien dimlapítí, pok rin. Adim va jinafa kuranira lajukoaykayá kore ina tiyir volpestorapafa is volrogrupena gan kot artel. Ikagadikye tiyir kulafe, va jin wetce intaf nazbeik torigiyir. Vexe volokon groleson, va bliramergil miv wan djuwayá ; aze ko Wien adim lajudimlapiyí, den vuwik, wetce unenik ke oksikazafa tretcapa.

Kas gokalí liz taneon lapiyí, viele bak braf muvugalaf sielcek, adim ! adim ! ko Wien artlapiyí ? Va jinafa biloxa koe golda iskeyé aze va lundek ipeyé, voxé maneke viapon cwe in abdulapiyir ! Kota recela va jin tabodjayar, aze adim va mona kabduvulteyé. Rinaf dilkeem zo koafiyid, jinafa varafa takra tizon sionayar. Batviele oxam va abica blira koe bata widava

dimdrasuyú, lecen inafa iyeptapa batvieli al tiyir endivefa gu jin is envlardaфа gu sugdala ; bam oxam gin bliyí, pesteson poke rin, poke jinafa kotvielufa klokara. Me vantrakuyú ugale yon krant isu meftava isu kuksa wale min tigiyid da sume rinafa trakura me tigiyí loon dam batvulon viele wale rin is jinafa jebesa disukera, tiguafa koafina ralpa ke rinaf dilk anton tigiyir. Ticon disukeyé, ware ticon : banlize afi tiyir, banlize mona tigiyir, banlize tigiyil, rin jinafe tame. Remi tolda va bat bartiv al klokayá ; va in re rotugalayá. Azon sielcekon, bak bat rujodas is zjnas muvugalaф sielcek, kabdue rinaf dilkeem kali artafira zavzagiyí. Oxam azon va jinafa vreda kevlaniyí.

Kotsielon, kabdu rinafa mona dimlaniyí. Kali teve bartiv, dene dolta kobayá ; tiyir olgafa is duxasa kobara, vexe albaya lecen bata tegira tatceyer da va jinafa perzuca kan li krana v satoleyé. Ise vielu azilmarwida moi jin al zo omayar, kal abegaf play rontion vulteyé. Jinafa tanafa jugemera tiyir da tanon co di rowiyí ike co di rokakeveyé ; da iluon disukeson va rinafa gexata gire co rokutcayá. Arti tanoya safta batcoba sokiyir viele vugeke zinulayá : edje va ticeon rinaf dilkeem dizveyé, remlanison va vawila van jin laniyil. Bam levgon gire vanpiyí san-bardikya inde al tiyí ; va fortey oras kal tcor pestaleyé ; nekev koekafa jugemera va wira va rinaf iteem, volins takomayá nume dum laiten govitol va rin kabduovulteyé. Azon tiyí kinokaf gu bata kovudana yatera ke jotaf bemik, lecen jinafa kuranira re tiyir aftackafa : va rin djukevlnayí, trasiyí, gan rin zo djugrupeyé, radimi jontika tanda edje jinafa kera koe izga al zavzagiyir ; gan rin zo djukarolayá, zo djurenayá.

Vexe va jin jontikedje me katcalayal beka kotsielon, dace lev frelkasa noldara is fikafa is bugdasa sukara ke Wien, koe vawila

pitcayá. Fereon konakbartivon giopon keyé ; fereon do worasik adim denulaniyil ; tolon, va rin do ayikya dere wiýí nume, batvielu gildayá da al atriyí. Viele va divefa ayikya frendapon pokelanisa va rin is gisa va ma wiýí, pune jinafa takra levgon ve skotcoteyer nume va gloga sollipayar, pune va warzafa is amidafa adala ke jinafa renara va rin pestaleyé. Me zo akoyeyé larde mali jinap sardaf vieleem va rinyona kotabafa worasikya ixam grupeyé ; vexe re altokafa kranavinda laizon unt dilizeyer, nume koncoba unt sotceweyer, i coba belcon plabafa is djumasa golde bata denafa altokafa yastuca do artanya. Tiyí rumeon oklaf voxre rotir re wan tí, nume bak tanoy afizcek sumeon zavzagiyí ; vexe bat vlardaf sielcek tiyir virnaf, koe intotcuca is keviera, edje va rinafa mona me wiýí ! Sielon direvienlon va int dulkon gin playeyé ; va rin keyé, wan keyé, milinde remi jinafi kotafi bali lente rinafa blira budena al ké.

Aze adim, lansielon, va jin katcalayal. Va rin ilulanis al wiýí ise va kotafa kuranira avplekuyú enide mou rinafa kelda me di mangiyí. Xuyava askiyir da basvajan direm va vawila riyuyur nume va jin godrumolaniyil. Rinafa gariandafa disukera ben jin va int volins aykayar aze, kreme kevfiyison va tela jinafa, vanpiyir bata rinafa disukera va ayikya, i bata disukera milgafa is santasa is miledje kalfisa va cot, i bata disukera mantafa is ixam olgalicusa is taneon artazukasa va jin rumeik gu ayikya is renasik. Ax ! maneke batvulon skotcoteyé ! Bak tanoya ik toloya vula, bata disukera va tela jinafa medjubulusa va inafa lictara batinde droleyer, aze pokolaniyil. Jinafa takra sionayar : va jinafa lanira volins gotuviyá, ise edje tison rilitapaf rwodeyé, pune wiýí da al vukiyil aze va jin kakdisukeyl. Ise yoke rinafa rilitapafa dizverinda, ve gildayá da va jin me al

kagrupeyel.

Va jin me ve kagrupeyel, me batviele mei meviele : somekagrupeyel. Tokkane, ey renanye, va gribidga ke bata vula co ropimtá ? Bam va balima taneon levgayá, i va balima da gan rin me zo kagrupeyé, i va bata balima radimefitisa va jin remi kotafa blira is dositasa ko awalkera : da zavzayá megrupen, somegrupecken gan rin. Tokkane va ina co ropimtá, i va bata gribidga ? Lecen wil, remi bata tolda koe Innsbruck edje va rin dun trakuyú ise dun va minafa kakevera modovayá, i va taneafa kakevera viele ko Wien di dimlapiyí, va loderolas siak oku lofelbes sedme jinap aflicerasok al guzekayá. Va kotcoba klokason al gixuyú, ede batinde ropulví ; bak batyona rotatrakurevafa vula al gestiyí da va jin di dimemudeyel, da di ikudayal lecen tiyí melafokarsaf is evakarsaf is mazukerses. Va kot rotis tazuk ke rinafa volprogera, i ke rinafa fentaluca, i ke rinafa brunuca, va kot al exuleyé, koe yona skeusa corara ; vexe bak jinyon lodorikaf bartiv, koe jiligararsa va jinafa rotakuca, va lana tela lomayakafa me al guzekayá : va jinafa kruldera dace meinde al dulapeyel. Re, gildacká, ~ ax ! rin va gildara va batcoba pu jin al tavel !~ gexata ke yikya ok ayikya vrebon sotir arapenipisa coba sedme ayikye ; cugviele, ina anton tir elza liz va onton skeura ok onton rumeaca ok onton legaca tcazedad, voxē drikon lion dam ewava ko situla krezer. Nume ayikye va gexata ke ayikya lodrikon rodrasur lecen klaa va izga is afi beneon betar, ise warzafa cava amidon xutad. Trobindasikya, batse tela digisa va ageltucafa opa va blira. Vexe jin, oyikya inde banugale tiyí, me ware rogildayá da va jin co vulkuyul ; lecen me grupé inde, va rin kimiskon dun lasuviusuyú nume korcafa rieta unt al tazukaweyer : da cwe rin dere, va jin

jontikviele setikeyel ise keyel ; tokinde co wan rokagaelayá ede co laneyé da tiyí mecoba mu rin, da meviele kona setikeks va jin va rin zijnon co drumfiyir ? Bata kranavesa divmodera lente rinafa disukera nedisa da mecoba koe rin va jin mea grupeyer, da mek setikes fem va rinafa blira gu jinafa zokeveyer, batcoba tiyir luxe jin taneafa akeoyera ko geltruca, i taneafa abdipestalera va jinafi bali.

Batviele, va jin me kagrupeyé, aze arti tolda viele katecton gu warzafa kakevera rinafa disukera va jin yastackon anamplekuyur, va jin wetce telya renayasa is laninde tazukayana gan rin vox opelon listafa san-anyustikya millize gamdayasa va rinafa kelda weti tolda, gire me kagrupeyel. Va jin necion akoyenon disukeyel ; kicegarama anam rinaf art zovdaweyer. Gire, va jin pokolaniyil ise va bora kreme tuviayal. Toz skotceyé, apulvon daavon bupayá. Wari anton va rin fu gukoeyel ! Pestaleyé da mu rin taneatomon kruldeyé ; dere jin, va bora tuviayá aze va rin keyé. Aze levgon, me rwodeson, pestaleyé da kadime jin tigiyil ; grupeyé da re, taneatomon, va rinafa abegafa puda pulvisa pu jin fu gildeyé. Kera unt tiyir alizirinda, nume golde takra sionarsasa va vukira kivayá. Pok jin artlaniyil. Kan rinafa zjinafa saipuca pu jin toz pulviyil, dumede jontikedje tiyit nik. Ax ! va beta rieta icde jin me dadiyil ! Meviele va jinafa blira koninde al rietal ! Pu jin igeltapon pulviyil eke dace rodulzeyé. Va varafa vawila belcon kenolaniyit. Azon eruyul kase do rin di djusielestuyú ; ve naleyé. Va tokcoba pu rin co rovevewayá ?

Koe voltaxeme belcon sielestuyut. Kas wan grupel lize batcoba dilizeyer ? Volgue, kire va bat sielcek gu jontikar gundaf tce me soltrakul... tire, va toktan mu rin tiyí ? Ayikya

walu decemoya, stuva koe roda dem stuva dadisa va meropatan ametcolkeem. Ise va tok setikeks ke jin co rosuyul ? Pulvimiýí lecen rinafa tigira poke jin is gildera va rin tiyid lumiskafa kaluca. Bibeson ok fitulon pulvison, va beta vula ke rinafa prilara me djutinuseyé. Meviele jinafa volniauca va bat bartiv vulkultur. Va coba kena gu rin gan jinafa skeusa payura dulzapayal ! Tiyil krenugaf is zíjnaf is wervapaf, mevoltixolaf, melatukaliason va kona santasa krenugaca ; mali taneafa vula va aulafa is notafa dirnura nediyil maneke va jin kotron co levrotiyil kore ke rin do jinafa varafa kuranira isu tise me ixam co tiyí. Ax ! meawuzason va kesa alubda ke jinap sardugal, va rinafi mafelafi tegi batsielon kotaskini me grupel !

Gaveon, mallaniyit. Kaike tuvel ke voltaxe djugrupeyel kase tiyí kerujaf oke va ugal dadiyí. Tokkane co palseyé da tiyí progen va rin ? Dulzeyé da va ugal dadiyí. Aze, moticasón va klaburama, eruyul kase ta ginélara den rin abicedje co di djupiyí. « Balte », kalyí, menueckeson is torigison va batcoba gu gubeaca. Nume vere wiyí da kaliuca ke jinafa kalnalera va rin al vannariyir, volplinon ok rotir mempenon, voxé kottode lavion zo akoyeyel. Re, va rinafa gevanuca gildayá ; grupé da dace viele ayikya djukempapar, gubeuca sotir da va intafa jugemera govvolwelidar ise zo nujikovudar ; taneon sokerur da gan xuvasa blikera ik rotuxara ik abdiplekura ik vruzara zo di vandilir. Grupé da rotir ant renebikya, i tresenikya, va mana ganera lidaavon is livaron fineson gidulzar, ok jotackafa sardikya oku ixakapafa. Vexe unt ( tokinde rovantrakuyul ?), batcoba anton tiyir kuranira welidasa pu int, i lujafa jugemera kagiyina remi lo kunoy viel num levgon muxawesa. Vexe kottode, zo pedrayal, va rin toz dulapeyé. Lanison almayá da

remi prilara va jin daduon is gevackanon rindeyel. Rinafa pestá, bata pestá diolon musafa icde ayafa swavopa, va volgubeaca griteyer, va bula koe bata agralafa is puvotesa oyikya diepileyer. Djugrupera koe rin zo divmodayar, ise kan anamplekus is rukuzaf tazuk ke rinyona bibera katcalayá da va bata bula djumivamudayal. Vexe djerkayá. Abdualbayá da bevulayá oviskaf lodame va jinafa birga co basitalayá.

Den rin ticlaniyit. Va jin skalel, renanye, ede kalí da me rogildal inde bata ticlanira is bat fogelom is bata grijuca is jinafa skaltenuca tove jin tiyid, i mana oviskafa is nakesa is riwe atasa kaluca. Ware re meboreson nemon rotrakú, neke va kona ikuza mea dí. Vexe anton gestil da, batlize, kot plek laninde tiyir plawukenaf gu jinafa skeura, va leca ke jinap sardugal isu kera kaatoeyer : tuvel kabdueon lize va rin deciton al ké, fogelom lize kotviele ulijdayá ise va rinafa bora diepileyé ise va rin taneatomon wiyí, wezama lizo va jinafa varafa gloga al grurabralá, tcalist kabdue tuvel liz lanviele badenyayá, dwera ke marna askisa da va terekta play vagrableson jovleyé. Remi varaf sardugal, koe bata darkama jinafa kotrafa skeura va intafa begama batlize dadiyir ; batlize jinafa varafa blira tigiyir. Voxel banse zivotcinda mo jin lubeyer, viele kotcoba, kotcoba kevskuweyer, ise do rin, jin do rin ! va rinafa mona kolaniyí, va minafa mona. Trakul da kal rinaf tuvel, ~ jinap ravlem tire nuvelad entaf, vexe arinde me grukalí, ~ kotcoba remi jinafa blira oxam anton al tiyir gabentafa geltruca ; lente jin va spupiafa is vieleafa tamava anton al wiyí, aze bam vecasa patecta klokana gan rumeik fenkuweyer, i gazaxo ke Aladdin. Trakul da, kunon, va bat tuvel re yolkanon remlanin, jinafa ita lujon al modisukeyer, nume pestaletel, ~ anton pestaletel kire

renanye meviele gruvecketel !~ ote remi bata fansilesisa wexa bartiv ke jinafa blira applekuweyed.

Dene rin mielcekon zavzagiyí. Me vantrakuyul da abdu rin kone ayikye va jin men al uzayar, dace metan al vwalayar oke va jinafo alto al wiyyir. Tokkane co levaykayal, renanye ? Larde va meka acagira nediyí, va kota werkafa klubura rujayá, anton enide va birga ke jinafa rena mu rin me di rodiepileyel kire efe co zo kovudayal, larde va foktuca ik vefara ik niustera anton sokalbal ; socubel da va koni bali koropil. Va kota daava ke tamava kimiskon djugrivotel voxé va meka wetara djumel. Renanye, ede re kalí da tiyí ketaf viele va rin kempayá, vay va jin gildackal !? Va jin me koridá : va jin me al guivel meie al restel meie al brostal ; jin, ant jin, van rin al laní, va rinafa berga num intafi bali al ipé. Meviele, meviele koridatá, me ; volson, kotviele grewatá lecen ban mielcek al tir kulackaf is dreldon sizuntas is kalon divdomas mu jin. Viele koe tapeduca itafenkuyú ise va rin keveon uzayá, pune destayá da bitej vamoe taka me tigiyid larde kelt nutiyir pokepaf. Me, renanye, va koncoba icde ban vuleem meviele batcayé, meviele. Wan setiké, viele kenibeyel ise va rinafa gandira gildeyé ise va rinafa alto uzayá ise keve rin cugeke pesteyé : koe izga kalon boreyé.

Bangazdon, ampuson mallaniyí, ba wavepaf bartiv. Ko dolta golaniyí voxé abdi lanira ke kwik dere djubuluyú : in me di gowiyí. Moida va int al vageyé, batlize lente rin ranyeyé, va jin mayal ise disukepeyel. Kas batcoba tiyir savsaf is tapedaf setikeks unt kaliziwes, oke opelon iton gu rin nuvelayá listaf is kalaf larde tire en tiyí ? Va jinap art kutcayal. Ta mallanira va int zijnon grifuneyé. Bam eruyul : « Kas va abica imwa djudivuburel ?» Gue dulzeyé. Kou trig kum faltaf vewuk moe

baza ( ax ! va bat trig, ixam grupeckeyé, mali jinafa tanafa is anyerkafa lekefa disukera ) va balemoya batakafa raltada nariyil aze ziliyil. Remi konak afizcek va sina kev kutc di plekuyú.

Moida bulura, va ara kakevetca ixam al kogorayat. Torion laniyí, nume gire batcoba tiyir ribiegafa. Va bareaf mielcek pu jin ware yaleylel. Azon kaliyil da di gonokoyayal, ~ ox ! va batyona koyara, mali sardugal maneke ilkadedyé !~ ise abdiplekuyul da, moi dimlapira, va jin di boyoteyel. Va jinafe mane vas piutefa iskera ziliyí kire va yolt medjukaliyí. Va jinafa birga videyé. Gire ba donera va abica raltada ziliyil, i va raltada ke done !

Kotvielon, bak toloy aksat, laniyí... vexe me, tokdume va kustofa olyastera pu rin co pimtá ? Me koridá ; va rin rená inde til : lujaf is vulkusaf, disaf is volsagaf ; batinde rená, anton batinde, inde kotvielu tiyil ise re wan til. Jontikedje al dimpiyil ; rinaf koafin dilkeem va jin givayar, voxé me suteyel. Va meka conya ke rin digí, re, ba jinap bocaf bartiv, i va meka conya ke rin ziliyimb va jinafi bli. Al ké, kepé dum gripokolenik. Vexe me sugdadaya, va meka conya suteyel... va meka...

Jinap nazbeik arinton al awalker, dere tiyir rinap. Dere tiyir rinap nazbeik, ey renanye, i nazbeik ke konbat baroy mielcek, pu rin vogá, ise metan leve izga ke awalk sorotuxar. In tiyir minap nazbeik, vogá, lecen mele ayikye va jin uzayar mali batyon bartiv viele va rin kempayá kali nazbara. Uzera keve rin va jinap alto al tubaerdayar, vile jin : tokkane gu rin tiyis kotcoba mu jin, is gu bet artan nemon rovwalas va jinap blira, va int co rowalziliyí ? In tiyir minap nazbeik, renanye, nazbeik vey jinap gwidafa renara is rinap ewarafa is getcafa is riwe

mejilafa krenuguca, minaf nazbeik, i nazbeikye, minaf tanaf nazbeik. Vexe re djugrupel, ~ rotir kovudanon, rotir nemon gevanon, ~ re djugrupel, ey renanye, dume remi batyona tandapa va kruldera ke bat nazbeik preyutayá ise dume oxam re pulví edje in batlize senyer, kenibes koe mielak, kotvieli kenibes, ixam djuprobulus az mea dimpitís, mevielu ! Wori, tokkane co rokaliyí ? Vol co foliyil, va jin diveikya fakarson koziliyisa va bat baroy mielcek, i va jin meklabuson kempayan, dace lujon ; meinde co foliyil da bana ayoltikya preson kakeveyena va intafa saguca di videter, mu rin mesagik, meinde va bat nazbeik wetce rinaf merodaxason co pilkomodayal ! Meinde, kore jinafa kalira co nutiyid ageltodafa, va uculera unt co rotogoleyel, i va uculera da va gaduca ke divef nazbeik pu rin tis kulaf layofteyé. Va jin co uculegayal, izga wal rin is jin co zavzagiyir, i gojafa is rodaxason ezasa izga. Me kuraniyí. Ison va rin grupé ; grutepé voldum va int grupensel : lané da laizafa gaduca, i laizafa bloduca ke tanoyi bali co tiyir portaca, tove rin albas va ewaruca is foktuca is vefara koe rená. Rin anton nuyon kagaelas, co pesteyel laninde gluyan do jin. Va jin golde... ~ en, grupé, kev rinafa jilafa kuranira co askiyil... ~ golde bata levplekura co bogayal. Co tiyí vitcaf, va jin co ilkadeyel, rotir anton konakbartivon, rotir anton bak walukam vas konaka wexa, vexe intotcon djumeyé da va remi blira va jin enrujodiskon di trakuyul. Albackayá da va kotcoba vajuleyé lodame di vanpiyí vaj tove rin, djukutiyí antafa kota ayikya, i tela kotviele renason is volniaon rinon trakutuna. Vexe ae, va jin meviele al trakul, al vulkul !

Va rin me koridá, renanye, me, me koridá. Ixel da konakviele pirafa belaxa benu jinafa bruxa traspur, ixel !! Vexe

kas jinaf nazbeik, tel minaf, valeve daruntesi afi ke tsoka me senyer ? Van Lorik nubalicason al masotcé ise va in gu gomilik al duvú ; gojuca is skaltera koe jinaf pesteem gazad. Va bata temera ixel, vaon ixel !! Grupecké da iste takra til vonaf is grelesaf, da va tcicera pu kot yanesik gikozilil, da pu bet diveik erus dace kozilil. Vexe rinafa vonuca tir abigapafa ! Tir vonuca fenkuna pu kottan, kottan vaon rolirder nume va nuba rotukotrar ; tir gjajafa, gjajapafa, rinafa vonuca, vexe va jin skalel, tir peckafa. Zo djudeblamer, tizon zo djumaskiper. Va rinafa pomara, sozilil viele zo rozel, viele zo blikeyel ; va surimara, werkon is axon vols puvegason kozilil. Novel da ronjon kalí : rinafa rena va olegasik ik kuncasik lodam kalaf berik somekulmer. Ise mantan dum rin, dace tel lokiewaf, va blikera pu battan medrikon somaner. Lanviele, ware tiyí sardaf, rem tuvelweza wiyí inde va wipitesik mamleyes den rin buriefayal. Va koncoba dace tcazafa vere ziliyil abdida in toz dildeyer, laninde ampuson kir nedison da djumeyel da kaliackon di mallaniyir. Cwe va modisukera kivayal. Va bata yatesa zilirinda, i va bata cubera, i va bata kivara va grewara, meviele al ilsetiké. Batdume va rin meviele gukoeyé. Ape grupé, va jin co greleyel, kore me co laneyel da nazbeik tiyir rinaf ; va jin co vinuyul, va jontika erba co ziliyil, vox kotviele kalion is birgon djumilplatison va kota meplinaca. En, dace folí da co plataeyel enide va nazbeik abdi nazbara di sulá. Nume va batcoba, kalkivayá kire co di askiyí larde co eruyul. Tokkane pu rin va betcoba co rodevewayá ?!

Vexe bat nazbeik tiyir kotcoba mu jin kir vey rin ; dere tiyir rin, mea kalaf ewarik tiyis rin vox jinon merokagin, nek rin kotvieli jinon gopasun ~ trakuyú, ~ koflintayan koe jinafo alto

num gluyan gu jinafa blira. Adim va rin giyí, re ; koe jinaf litceem va rin blis is atris unt pestaleyé ; va rin fu sinkayá, fu vanvrodackayá, fu santapayá ise fu kutcarsayá, viele jinafa gloga jugemeson moanteyaweyer. Wickil, renanye, batdume raveson da va nazbeik vey rin bureyé, al tí kalaf ; ise batdume vol djugakaliyí, lecen batvielu, va jin mea rodivvawayal.

Ae tire, renanye, kot aksat azon me tiyir kalaf, voldum jinafa trakura abdion wauneyer. Dere tiyid aksat kotraf gu akluca is olyastera, is kotraf gu struca ke ayikye. Jinafa debala tiyir mefakafa. Bak konak ironokaf aksat, ko dolta mea rolaniyí kire va obrara ke tilafa yasa me djuvanimpayá nume jinaf gadikeem co zo walzeyer. Va erba pu gadikya me djumeruyú ; acum kali nazbara, va dolera va abica digina roga blidayá. Ba tanoya safta abdi tunuyara, lan kwik va jinyon abic bocaf erbold kou rastoka dubieyer ; batdume ko ropexe bam golaniyí. Banlize ant faxafa lowawikya sogelbed, i griwelidanikya ik vulkunikya, banlize vanmiae loon vogitesa copuca, banlize nazbeik, rinaf, al koblir. Bate ropexe sotir gobogane ; kotcoba tir divefa, divepafa, diversafa ; ise va sint wetce diveik disukekeyev, cin banlize daykeyev, antiaf is belcelon kotraf gu bogara, cin gonorundanyas va bata bonta dem tuakolas alpoz kotraf gu kudel is fortey is ie is bre. Va kotcoba wetce plukera is lidafa is altokafa situndara, i va kotcoba solevgana gan wawik al mejé, koe bata vegunguca do yon tresenik isu akolik, askison va dofa krizuca gu cinafa balidoda... Lev oxuca ke batyon jotaf kurmik beonakiceson kamadas va ilavadualt is tsedes va alto ke ayikya, yontajason va opaf uum... Do tigira ke yona fliwafa ikaropesikya. Ox ! Banlize, ayafa werkuta va gamdatasa disukera is custasa ewa anton sokakever. Yolt moe yuwega,

batse kotcoba zavzagisa ke int, lecen coba daykesa moe ilava anton tir eruilt dem cepites cot geltan gan rilitik is anton tis kabdunediks is vayaks. Ox ! ina me gruper, tela ayikya firvisa va nazbeik pu vetcoyesaf kurenik koe intafa mona, dacoba nazbara sotir viele ayikya ant tigir, menendanon is dum moe kurmabagalarafa azega. Ware re, viele va « kusto » trogarn koe neva kakevé, va bata tarikirafa bonta nekev int ve trakú lize, vanmiae dakelaja is bre is kipe is forteyotafe ie ke yona koezbanikya, al mejepé, koe bate baliexe va werkuba.

Ixel, ixel da va batcoba pu rin pulví !! Vexe tanon is anton askí nume mea pulvití, mevielu. San-tandon meinde vaon pulviyí ise fure tití kotabon pulviskaf. Tanon goniegayá droe bat nazbeik tis jinafa kaluca vox re batlize mea zekas luxeon al tapileyer. Jontikedje, koe kicegara, koe puda ke nazbeik, koe jinafa kaluca, va banyon bartiv al ilsetikeyé ; vexe re in tir awalkaf nume rejdera va jin, ina, al tublisawer, nume tanon vox battanon iegason va batcoba, va gloga godekiazayá.

Va mecoba ke rin koridá ; va Lorik anton koridá, i va Lorik lisolovan djurejdeyes. Va rin me koridá, vogá, ise kev rin va int meviele zideson madayá. Dace viele jinafo alto kranaveson mucuweyer, dace viele lente kon jotaf kurmavayasik kinokon anteyaweyer, levgason va uzara ke inyona disukera, dace viele kranav va gloga ve gosayar, va rin lente Lorik meviele koridayá, va minyon mielcek meviele batceyé ; meviele jinafa rena mu rin va beta jinafa culimera al levgar ; va rin kotedje al rená, va bartiv kotviele al kumzilí viele va rin al kakeveyé. Ise kore va kusto ke banyon bartiv gire co remfití, kore va coba dilizetesab abdion co grupeté, ey renanye, va coba jinon askiyina ware gire co askití, ware tanon, ware kunon !

Minaf nazbeik arinton al awalker. Va in meinde al grupel. Meviele, dace xuyavon gu kona presafa kakevera, bat imwaf tisikam, vey rin, va rinafa disukera drumolaniyir. Vielu va bat nazbeik dikiyí, ile rinafa disukera va int jontikedje palseyé. Jinafa lujafa rena mu rin leeke al kranaveyer ; dace folí da lion skeuson mea renayá ; icle, jinafa rena va jin lieke mea mejesiyir. Wal rin is in va int me djuwalziliyí ; acum va rin tis kalaf is blis eze jin me ektudayá, volse va bat nazbeik olegas va jin is gosinkan is roman is rokutcarsan. Gu skaltera rinon impayana ko jinafa gloga al zo nutunuyayá, solimpayanon gu baliji, adim giwayanon gan batar rin nekon tikis ke jin ; nume bam rion, riapon, jinafa skeura kabdu rinafa mona dulkon laniyir. Va tanoya coba askiyí : ba kot rinaf ilanuk, va tsenke dem batakafa raltada stakseyé, i dem raltada milafa gu telyona rinon firviyina moi minaf taneaf renamielcek. Kas remi bata sanda, santanda, konviele al nuel : toktel stakseyer ? Kas va bantelya lanviele firviyimba va nuxafa raltada rotir al setikel ? Me grupé ise va rinaf dulzezs mevielu grupeté. Luxe jin, birgafa firvira pu rin is divatoara va setikera ke bana vula tiyid staperá.

Va in meviele al grupel, i va minaf kimtaf nazbeik. Re, va int saté da va in gu rinafa wira al palseyé, lecen va in co renayal. Meviele al grupel, i va kimtaf nazbeik, meviele va in kices al wil, viele in gutamadamayar ise ebeltaf is gruf iteem, rinaf iteem !, kev jin is varafa tamava va aftafi is daavafi afi mimayar. Ax ! in tiyir kolukapaf is mempepes : kotafa foktuca ke rinafe tise koe bat nazbeik katrasiweyer ; rinafa blifa is ferdasa gesta koe in tuwarzaweyer ; remi yon varaf bartiv, in kan plek oviskon rorelandeweyer, dum rin djukavefas va bli ;

azon gin tiyir ekemaf ise kabdue intyona neva woltsoason debanyeyer. Inafa vektasuca do rin kotvielon laumayar. Dace ixam bata jontoluca dem ekemuca is itupuca tisa rinafa lavion toz voneweyer ; ise loon in va rin vektayar, pune loon va in renayá. Tavuckuyur, ise dum guvaxa francavon ginelayá ; inafa nuka tiyid tela locufa ke pula ; ison tiyir agralaf is glabaf koe aboz kum ebeltafo piako ok batakaf awem ! Kotliz laniyir, kotviele tiyir tel losolwikaf ; viele va Grado piluda do in moolaniyí, ayikya vukiyid aze va inaf latkaf usukap santayad ; viele moe Semmering impadimotuyur, korik van in mafelason rwodeyed ! Tiyir listapaf, gedelapaf, puvotesapaf ! Viele, daretandon, vanpiyir sokesik dene Theresianum olda, nutiyir jotaf oluamik ke san-pere decemda yoke intafa diskirinda va tantazukot is dugam. Re, va ant klaim diskir, kimtaf nazbeik, batlize senyes, ton kseviskaf kutceem is nubagamdason.

Vexe rotir djugrupel kane va in batinde al rogaá, koe tapega, kane al jupá da in va mana sizuntasa is daavafa blira ke ontinapulaf velik rotugalayar ? Renanye, pu rin istu izga pulví. Me tí kinokaf, fu kalí, voxé me zo kovudal ; renanye, va int al dolé. Me tickiyí duvunon tresenik, voxé va int al dolé. Va yon kulaf nik is tufakiraf fertik al dikí ; taneon, vaon aneyayá, azon sin va jin aneyayad, lecen ~ kas konviele al katcalal ? ~ tiyí listapaf. Kote ayikye jinon kempane tiyir vadulafe gu jin ; kote tiyir muntafe, kote va jin suveyer, kote renayar... kote vaxe rin, ant rin, ey renanye !

Kas va jin re vligul larde al razdá da va int al dolé ? Me, grupé, me vligul ; grupé da va kotcoba gildal ise dere gildatal da anton mu rin al askí, i mu batar rin, is mu rinaf nazbeik. Lanviele koe bata bonta ke ropexe va akluca ke copuca al

uzayá ; grupeyé da koe bata tamava wawik sotir kosik, tel oman is nugasistan, ise medroe djumeyé da rinaf nazbeik, i rinaf nazbeik liston sizuntas, koe kona wadra di atriyir, keve vawilaf yoromikeem di firugaweyer, koe alitas gael ke kono bedablo keve kusk di omuwayer. Inaf gedelaf art va xatcewa me di gogrupeyer, meie inafo wulafo alto va dakelajafa grita ke wawik di gogrupeyer. Rinaf nazbeik va kotcoba fiste di impavantayar, i va kotafa kuluca is kota vrendaca ke tawava : ekon ic rinafa blira fiste di madaweyer.

Batdume, anton batdume, renanye, va int al dolé. Vile jin batcoba me tiyir wetara ; lecen vile jin poruca ok volporuca, inde jontiktan gidayoltad, me kruldeyed. Va jin me renayal, ant rin pasun gan jinafo alto, nume kle va betcoba alto rotaskiyir, batcoba va jin gubrunayar. Santara ke ayikye, is dace inafa skeurarsa, va jinafa takra me konteyed, beka va jontika karolara pu konaktel koziliyí ise, lente sinafa merotisa rena kimbasa va jinafi bali, saara va jin jontikviele widlayar. Kottel grupeyen tiyir vonaf mu jin, kottel firvipiryir, kottel va jin karolayar. Nelkon biptik, nyobraf is klaapaf, me ilwayas kev kota godela enide gadikyeiskaf nazbeik, i rinaf, ko Theresianum olda di zo dosteyer. In va jin wetce nazbeikya renayar. Baron, balemon va jin kuredayar. Re, co tí biptikya, feliik ke ribiegafe lamone koe Tirol gola ; me co dwí lecen nazbeik va krenugafe is sontese gadikye co dikiyir, ise jin, va solwikaf is vonaf is zjinaf kurenik. Me al nalé beka in jontikedje karakepeyer, ise beka jinafa vewara va in rotupuyur. Va oviskaca co al rapplekú kire re aulon co blí, ileon koe kono xo is do bat nazbeik, i do bat nazbeik cugeke renan. Tokdume me co welidá ? Va int me djugluyayá ; djutiyí betviele rodadin mu rin. Iste jinafa takra,

koe mejilafe tise, bata guazafa sardafa klokara wan bliyir da rotir va jin gire co rozal, dace tori tanoy bartiv. Nume mankase, tori man bartiv, va kotcoba al ilplatí kire ba rinafa taneafa rozara djukuprogeyé. Kas kotafa jinafa blira, mali tena ke rumeugal, al tir arcoba dam kera, i dam kera va rinafa kuranira ?

Voxe bat bartiv geltron al sokir. Vexe me grupel viele. Me vantrakul, renanye. Dace banviele, va jin me al kagrupel, ~ meviele, meviele al kagrupel ! Efe, jontikviele ixam, koe wenyaxe ik dolpaxe ik Prater gerd ik vawila va rin al kakeveyé, nume kotviele jinafa takra ve skotcoteyer, voxé mewison pokolaniyil. Efe volunt tiyí ar ; kivasaf sardik al vanpiyir ayikya, i listikya inde jontiktan kaliyid, dem ilamtaf vaseeem is iste jontik mafelasik. Tokkane va vazafa oyikya wiyina leve mielafi afi ke rinafa mawa wetce jin co rotuculeyel ? Dile, kone ayikye tigise do jin va rin kiavayar ; dulzayal ise van jin itamadayal ; vexe rinafa disukera tiyir divefa lidam fraltafa ; va jin anton karolayar volse kagrupeyer ; tiyir ke diveik, virnon divefa. Lanviele, wan setiké, bata vulkura va jinafa ilka, riwe giltaveyena, tiyir rejdera va jin. Koe vistuk ke wenyaxe tigiyí, do nikye, ise koe vegungaf vistuk debaneyeyel. Runion, saneg zo artafiyir ; va rinafa gexata mea rowiyí, voxé va rinafa gaelera pokepon almayá milinde bak ban renamielcek al almayá, nume moe kadoma udanafa gu piako wale minyon vistuk, rinafa nuba daykeyer, i gemafa is gedelafa nuba. Lumiskafa jugemera va jin ve vangiyir : da co di xowayá aze va kutcara mo bata divefa nuba dulkon co di aykayá, i mo bata abegafa nuba lanviele krenugon kevlicayasa va jin. Anameon, lexa va intyon kostis rukom mopleyer ; jinafa jugemera loloon tuskeusaweyer. Va

jinaf nogleem govefeliyí enide wan debaneyeyé ; po vanimpaso va jinaf kutceem van rinafa abegafa nuba tiyir blipaf. Tici taneafa unecta, va mallanira pu jinaf nik eruyú. Gitagrupeyé da volsumeon tigiyil, divepaf vox pokepaf, koe tapeduca.

Vexe bartiv cugeke keyen soe sokiyir, ware gire, bocatomon remi jinafa drasuna blira sokiyir. Weti tagelton tanda tiyir, ba direviel ke rinaf ilanuk. Divulaca, va rin me al non trakuyú, kire va bat ilanuk dum kapa sofiptá. Rielon al divlaniyí aze va konaka batakafa raltada al lusteyé, i va bata kotilanukon volmiv sostaksena wetce setikeks va gemelt rinon drasuyun. Va nazbeik kielon gestayá ; ko Demel zomxonya dositayá, aze ko wenyaxe sielon stayá. Djumeyé da, in dere, laninde, mali jotugal, va bat viel gu warlafa kapa di torigliyir, teka va sugdala grupeyer. Azon, va diref viel do jinaf fertik ke bate sare tiskiyí, i do jotaf is kulaf rabik ke Brno do dan mali ixam tolda bliyí ise dan yalerseyer ise tudiersayar. Bantel dere djukuredayar, vexe dum milinde kotar, lavion medume al kovewayá neke va cin gu yal adoneyer, i va nazbeik is jin, ise neke tuke intafa vamafa vox levplekuna vonuca unt tiyir bagalif gu renara. Ko dolpaxe belcon lapiyiv lize va konaktel itupackaf kakeveyev ; koe voltaxe ke Ringstrasse bedom sielestuyuv, aze banlize, vanmiae kipe is ginelara, drageyé da koe *Tabarin stutexo* di laniyiv. Gubeon, bata tceminda dum kote mieluxe, dem roletafa kolukuca is divdomas ruyat, tiyir volluntafa gu jin ; ise bettel drages va mana deasera va jinafa vewara sokakeveyer. Vexe batviele, ~ va kona merofina diolafa gijarotiaca unt fopestaleyé nume va bat drageks levgon mejilon kabuyú aze kottel va int daavon lulanon kagluyayar, ~ va meropebuna jugemera vere satoleyé, dumede kona pilkovaca va jin banlize keyer. Gitis

plinaf gu jin, kottel ranyayar aze ko *Tabarin stutexo* laniyiv. Va *champagne* vor uliyiv, aze levgon oviskapafa daava va jin vangiyir, i dace riwe kranavafa daava inde mevieli al grupeyé. Uliyí ise ulipiyí, dankason dum kotar va yona nuyukafa danka, ise riwe merotacaginon djukudankayá ise djukususkeyé. Laizon, ~ cwe koncoba fentafa ok anteyasa kev jinafa takra aykaweyer, ~ ve vagrableyé : do konak nik bene vegungafa azeka debaneyeyel ise va jin mafelason is jugemeson disukeyel, kan bata disukera kotviele kalizisa va jin kal glogotsa. Taneatomon mali sanda, kan varafo mejilafo is skeuso po ke tise, rinaf iteem gire suveyer. Skotceyé. Galema jinon madana kou nuba riwe lubeyer. Bexe, jinap azegadositik va jinafa skaltenuca me sonkeyed, aze mila koe lorara ke kipereem is lexalaweyer.

Rinafa disukera loloon anteyayar nume ko reliezak va jin varaf estobasiyir. Me grupeyé kase adim, va jin adim al kagrueyel oke wetce ayikya men dabluyuna jugemeyel, i wetce konara, i wetce diveikya. Fortey va tcoreem ticniyir, ise pu yon korik doon tigis ewaron dulzeyé. Tce al katcalayal eke rinafa disukera va jin skalteyer. Takumason, merowinon gan kot artan, eruyú da ko zeria abicedje di divlaniyí. Azon va droka dikuon verkayal ; va rinaf nikeem vruguyul aze divlaniyil, abdilon ware sugdadason da va jin diveon di keyel. Skotceyé dumede co fenteyé oke co vozeyé. Va kona bibera mea rodulzayá ; va jinap lembiegarsas fortay vol felileyé. Xuye ba bata vulacka, ebeltikafa tola, buuktazeson is opon kizoyuson, va warzafa is divulafa stuterinda bokayar. Kottan va ina modisukeyer ; va bat verast impavantayá. Ranyayá aze pu fertik kalyí da kreme fu dimlaniyí, aze va rin kadimelaniyí.

Diveon, koe zeria kabdue liozaxo keyel. Rinafa disukera koafiweyer viele va jin wiyí. Kicegason vanvulteyel. Vere wiyí da va jin me kagrupeyel, da va darekef sardik meiu oyik me kagrupeyel. Gire, nubasotceson van jin, van warzafa kontanya askiyil, i van megrupenik.

— Kas, konviele, va tanoy bartiv, pu jin dere, co rotektul ?  
~ yaston eruyul.

Yoke rinafa frenduca, pestaleyé da va jin wetce konbata ayikya va int gidolesa tori tanoy sielcek torigliyil.

— Gue, ~ kaliyí.

Batcoba tiyir mila « gue » ewa, skotcesa nek tuwavafa is fineckesa kane weti loon sanda oyikya banugale tisa koe nomafa vawila pu rin al dulzeyé.

— Tokviele va sint co rowitit ?

— Viele djumetel.

Lente rin, mekon tiyí kinokaf. Va jin gevamanon disukeyel, rodaxason is riliton milinde lente kaliuca ke jinafa enkalira lekeon linulayal.

— Kas re progel ? ~ klabumuson eruyul.

— Gue, ~ kaliyí, ~ mallanit !!

Va jinafa lioza ko liozaxo djutrasiyí.

Batvulon, setikeyé da lioza ke fertik is tela jinafa belcon tigiyid ise in va bromta dadiyir. Dandackiskon me rodimlaniyí

meie roteruyú ; ison, va bat bartiv rotiskin do rin vol djuvewayá, i va bat bartiv lujon jugemen mali konaka tanda. Batdume mekon klabuyú : gu jinaf sedok mo sielgem va int keldaskiyí aze ko braf is abdaf miel divlaniyí, meviunsuson va lioza, metrumason va krenugafe vonikye tublisise va jin mali tolda, i metrumason va battel jinon tukipeapan lente inyon nik, batinde jovleson ba taneafa itumara ke kone diveikye, jin tis mali tolda inafa fertikya. Ox ! va struca is niauca is jinafa krizaca tove puraf nik cugeke unt jiligackayá ; pestaleyé da kipeon tegiyí nume golde jinafa oviskaca va vonapikye kotvieli is awalkolon kantayá ; sonkeyé da va jinafa blira empayá, vexe xabe va tokcoba nuca vodayar ? ika dro vas jinafa braldera da va rinaf kutceem ware tanon djumuzayá ise va rinyona krenugafa ewa tic jin djugildeyé, va tokcoba kruldera vodayar ? Batinde va rin al rená ; re rokalí, larde kotcoba tir darekefa, larde kotcoba al tenukewer. Ise folí da ede va jin moe awalkilava co rozal, va po ta ranyara az kevlanira ware co trasí.

Direm kabdue tuvel tigiyir, aze den rin kalion lapiyit. Va rinafa puda gire gildeyé, va rinafa krenuguca poke jin gire pestaleyé ; lieke dam lekeon zo tugrijayá, wivgon gu mila rumeafa is gojafa kaluca. Ton tel ilamsiskerasok va fogelom taneatomon arti loon sanda gire ticumayá, me, me, me rokalí ; me ropimtá inde, bad bata abica vula, jontolafa pestaka va varaf darekeugal gu rekeugal ko jin dojeyer, meie inde koe batcoba, ko batcoba va rin anton kozwiyí. Abica betanuca koe rinafa mawa tiyir. Konaka loplekufa trutca, loote neva, batlize is banlize yono divufo guuto, voxé kotcoba va darsafa kiavara pu jin soe maneyer. Ise moe baza trig dem raltada tigiyir, i dem jinyona raltada, i dem tela darevielon stakseyena katecton gu

rinaf ilanuk is namion gu mesetikenikya, i gu ayikya rinon mekagrupena nek pokeon re tigisa ; neke rinafa nuba va inafa giyir, rinaf kutceem va inaf xuvayar. Soe, tiyí kalaf wison da va jinafe tsenke trumayal : batinde nekev kotcoba aname rin, gaelera ke jinafe tise ezayar, i kofiga ke jinafa rena.

Va jin mayal. Va varaf pluktaf mielcek do rin gire tiskiyí. Vexe, dace lente jinafa lebuca, me kagrupeyel. Kalaf, va rinyona grupeafa krenugaca roeyé, ise wiyí da va fertikya gu ayikya va int dolesa me tuamidackayal, da gu rinafa jugemera va int enzurteyel, kan varafa foktuca adalasa va rin isu getcuca. Tiyil zinapaf is krenugapaf tove jin, i tove battanya kakeveyena koe mieluxe ; tiyil solwikapaf is oluyapaf is trumapaf neke va mana skeura ta pojara ke ayikya miledje nediyil. Gire, tugrijan gan savsafa kranavera, va bata adalafa jontoluca ke tise koe rinafa pestapuveuca pestaleyé, i va bata keravafa is gwidafa skeura ixam artazukayasa va sardikya gu rinaf levetirik. Meviele va mana belikafa roera ba refa vula dene santase ayikye al grupé, i va mana traspuxa is mana ayewara mal otsa ke tise, voxé kotcoba azon tire griawisa ko lumiskafa is riwe meayafa kalvulkura. Vexe jin dere, roeyé : toktel koe tapeduca re tiyí, poke rin ? Kas tiyí lujafa pelfudikya ke lekeugal, ok gadikya ke rinaf nazbeik, ok diveikya ? Ax ! kotcoba tiyir yastapafa, ixam jinon ugalayana, neke kotcoba, remi bat skeus mielcek, tuke warzafi bli bupayar. Nume dun blikeyé enide in vol di tenuweyer !

Vexe gazda artstiyir. Gaveon ranyayat. Ta rielestura do rin gire ganeyel. Koe estuxo va yelada tixolon zanoluyuna gan merowin kwik belcon uliyit, aze ginelayat. Gire, kan rinafa ronjafa is oluyafa yastuca pulvickiyil, vox gire metixolon

mebibeson is exaksason va meka rilituca tove jin. Va jinaf yolt isu oga me eruyú. Ware gire, vile rin anton tiyí stuva, i ayoltikya, i bartiv ke skeura tugantozaweyesa ko vikiz ke vulkura meiskeson va conyuta. Pu jin pwadeyel da tolaksaton ok baraksaton koe Lentefa Afrika fure koyapayal. Iste jinafa kaluca skotceyé, lecen drume oblaka myelgara va batyona ewa ixam tauleyer : tenuweyesa ! tenuweyesa, vulkuyuna ! Tit rin va int balte co impayá, iegason : « Dostal !! enide va jin adim di kagrupel, adim, adim, arti batjontika tanda. » Vexe tiyí vazarsaf is nyukapaf is axarsaf is levetirotaf lente rin. Anton rokaliyí : « Aje !» Rinafa disukera ben jin va int kicegason rumkayar aze eruyul : « Kas guon en zo puidal ?»

Batvulon, perlerinda va jin levgon konariyir. Ranyayá aze va rin jontikedje disukeyé, acon. Aze kaliyí :

— Ayikye jinon renayane, dere, dun koyar.

Aze ko etcu modisukeyé. « Re, in va jin re fu kagruper », nueyé, skotces is kalatcen. Vexe kicegason anton dulzeyel aze vinuson dakteyel :

— Gue, vexe bettan sodimpir.

— Gue, ~ dulzavayá, ~ dimpir, vexe arse al vulkur.

Lana divulaca is lana skeunaca koe jinafa kalirinda tce fiyid, lecen dere ranyayal ise gevanon is krenugapon disukeyel. Va jin bene epiteem nariyil :

— Kiewaca zo somevulkur, va rin me vulkutú, ~ kaliyil.

Miledje, rinafa disukera kal otsa ke jin estobayar, cwe

djukoingason va jinafa ewava. Nume larde pestaleyé da ina koluyur, aneyasa is joxasa is gelavasa va jinafe varafe tise, batvulon, foliyí da diweda tuvolwisasa va rin su joaweyer. « In va jin fu kagruper, fu kagruper !» Jinafa varafa gloga trakuson skotceyer.

Vexe me kagrupeyel. Me, me kagrupeyel, ise, meviele tiyí divef loon dam batvulon, lecen edeme, va coba moion askitina meinde co askiyil. Va jin al kutcayal, ware kutcayal, skeuson. Va volvura ke usuk godimplekuyú. Edje kabdue situla tigiyí, ~ ah ! golde kinokuca is kovudara fokrezeyé !~ va rin, kadimeon, tixolon fargies va konak omeltfizudap ko jinaf ewazaltok wiyí. Tokinde batvulon tiyí pockaf nume me ieyé meie va rin kavalkuyú ? Jin, renas va rin mali sardugal, va jin, i va gadikya ke rinaf nazbeik, droon gu bat mielcek dodeyel ! Vile rin, tiyí durimikya ke Tabarin, anton batcoba, nume al dodeyel, en, dodeyel ! Vulkura va jin me stapeyer, ison va jin tustrayal.

Va jinaf vageem kalion treduyú. Djumallaniyí, kalion. Mejerseyé.

Ta narira va edji va nuba abduplekuyú ; ini moe baza tigiyir, poke trig dem batakafa raltada, i dem jinyona. Batvulon, olegara, gijarotifa is merotacagina, va jin konariyir ; va rinafa setikera fiste ware gire lasudivmodayá :

— Kas va tanoya rinafa batakafa raltada djuzilickil ? ~ kaliyí.

— Balte ! ~ dulzeyel. Ise vere va tana nariyil.

— Vexe, rotir ayikya va sina pu rin al zilir, ayikya renasa va rin, mex ? ~ katcalayá.

— Rotir, ~ kaliyil, ~ voxé me grupé. Sina gan megrupenikya al zo zilid, batdume cugeke albá.

Va rin disukeyé.

— Dere rotir sin va ayikya rínon vulkuyuna malnid ?

Akoyen, itamadayal. Va rin modisukeyé. « Va jin kagrupel, adim kagrupel !!» jinafa disukera iegayar. Vexe rinaf iteem noton kicegayar, megildason. Bocatomon kutcayal volse va jin kagrupeyel.

Van tuvel kalion laniyí kire va ikuza tic iteem pestaleyé, ise vol djumeyé da va batcoba co wiwil. Koe sarandaxo, ipepeson al divlaniyí eke va Johann rinaf kwik riwe apteyé. In kovudan welveson govomangiyir aze va tuvel levgon fenkuyur enide roremlaniyí. Voxe inde va in disukeyé, bak bata vula, gidel, bak bat tanaf verast, inde ton ikuza bene iteem va bate klaikye disukeyé, va laizafa afida sionasa koe inafa disukera wiyi. Bad tanoy verast, gidel, bad bat tanaf verast, rinaf guazaf kwik va jin al kagruper, in mewiyis mali jinap sardugal. Co badenyáyá, va inaf nubeem co kutcayá ! Gu ewazaltok va omeltfizudeem custayas va jin divimpayá aze ko inafa nuba fargieyé. Skotceyer, kovudanon disukeyer ; batvulon, va jin al vangruper rotir loon dam rin remi varafa blira. Kote ayikye pu jin al firvipir ; kottel vanyeyer vonaf tove jin ; rin, ant rin va jin al vulkul, rin, ant rin meviele al kagrupel.

Jinap nazbeik al awalker, minaf nazbeik. Re, va kontel koe

tamava mea dikí, i va mek artel gorenan dam rin. Vexe toktel til mu jin, rin meviele kagrupes, rin pokolanis milinde megrupenik va kuksa gipokolanir, rin moolanis va jin dum raporki, rin kotedje koyas is dakis va rinafa kelda is iskes va jin koe kotabafa kera ? Lanviele va rin fogiyí, va yatesik tis rin kan bat nazbeik fogiyí. Vexe tiyir rinaf nazbeik : bak mielcek, va jin uduton al bulur nume re koyer ; va jin al vulkur ise mevielu dimfitir ! Gire tí antaf, antaf loon dam kotviele ; va mecoba digí, va koncoba ke rin mea, va nazbeik mea, va meka conya, va meki lipi, va meka setikexa, ise ede kontan lente rin va jinap yolt co tiyar, pune tove rin mekon co sugdalar. Tokdume balte me co awalké, larde mu rin me kruldé ? Tokdume va bata tamava me co bulú, larde va jin al bulul ? Me, renanye, ware kalí, va rin me koridá ; me djumé da jinyona arubara, va daava ke rinafa vreda skalted. Me kival da va rin wan dustulé ; ixel, otson icu gloga godefieyé, tanon, ba bat bartiv viele jinap nazbeik bliriskaf is jovleyen batlize senyer. Pu rin tanon gokaliyí, anton tanon. Azon ko mielak dimpití, ise gin tití mepulvis, mepulvis inde poke rin kotedje al tí. Vexe bate ie va rin me kalstitir liedje blítí. Anton viele tití awalkaf, va bata bafela kazawatal, ke ayikya dure keyesa vox meviele rinon rozayana. Rotir, bam rotir va jin rozatal nume taneatomon tití volsagaf gu rin, larde koe taboxa va rinafa rozara me gildeté. Va mek delt isu pilkomaca pu rin iské milinde va mecoba pu jin al iskel ; meviele va jin kagrupetel, mevielu ! Batcoba tiyir rinafi bali remi blira ; bak awalkera milinde tir !! Ba jinap bocaf bartiv va rin me djurozá, malfí teka va jinap yolt isu gexata grupel. Drikon awalké lecen sumuon me sonketel. Ede golde jinafa awalkera co gomejel, pune me co rotawalké !

Mea wan rosuté... Jinafa taka tir rusagarsafa... beweem rotur, vozé... Cwe vere fu gosenyá. Batcoba rotir fure tenukeweter... Rotir bali konviele titir koxafi nume va jinap nazbeik divburen me wití... Mea rodesuté. Done ! renanye, done ! va rin grewá... Nekevon, batcoba tickiyir inde tiyir... Kali jinafa bocafa gaelera, va rin grewatá... Pesté kiazayan : va kotcoba al kalí, re grupel, ~ me, anton diepilel, ~ cugeke va rin al rená, neke bata rena va meka rusagaca gu rin isker. Va rin me graceté, batcoba va jin vinur. Meka betara koe rinafa cuisafa is afifa blira titir... Jinafa awalkera va meka argera gu rin daskitir... Batcoba va jin vinur, ey renanye !

Vexe toktan... toktan mevielu va batakafa raltada pu rin kotilanukon stakseter ? Ax ! trig titir vlardaf, ise axafa gaelera ke jinafa blira dere al tenukeweter, i gaeloy ke jinafe tise tanon kottandon ezase aname rin ! Renanye, terekta, bliké vay... batcoba tir taneafa is bocafa blikera manena... renon gu jin, askil va coba pu rin erú : ba kot rinaf ilanuk, lecen tir viel viele kottan va int sotrakur, va yona raltada pu int tiskal aze kotrigal !! Va batcoba askil, askil inde artan va tanoya mista mu abegaf awalkik kottandon volmiv kalid ; va ant rin sodirnú, va ant rin rená nume kan ant rin djumoblí... Ox ! anton tanvielon bak tanda ise kotron, kotron amliton, inde poke rin al bli... Bliké, vay, askitil, ey renanye... Tir jinafa taneafa vox dere bocafa blikera... Va rin grewá... va rin rená... rená... done...

Darekeon. Inaf skotces nubeem va twa nyur. Azon in jontikedje under. Setikerama va vegungafa sardikya az oyikya az ayikya kakeveyena koe mieluxe gojon ticfir, voxe bat setikeks zavzar klubaf is mesolwif, dum jebesi is skotcesi raporki dem mek anamezack vatite lava. Izga abdufid aze

dimefid, sometadleson va cufa ewava. In va yon krenugaf setikeks kalizir, neke me lajusetiker. Va kotbata vola cwe al klokar, jontikviele is jontikeke, voxé anton al klokar.

Bam inafa disukera ben faltaf trig moe kabdueon baza buber. In tir imwiskaf, imwiskaf taneatomon ba inaf ilanuk. In eafton skotcotemer. Luxeon koncoba, dumede, laizon, merowin tuvel su zo fenkur nume tutapasis gaelsalt kou banara tamava va auluca ke inafa mawa konir. In pestaler da kontel su awalker ; in pestaler da lana kruldesafa rena tigiyir : otson ice inafa gloga koncoba rumber, nume mu merowina fertikya lidam sumefa lexa, va volugafa is skeusa trakura in ve dikir.